



YANG BERBAHAGIA
DATUK HAJI MOHD SHAHABUDDIN BIN OMAR
SETIAUSAHA PERSEKUTUAN SARAWAK

BERSEMPENA

MAJLIS ANUGERAH PERKHIDMATAN CEMERLANG
(APC) 2019
JABATAN PENDIDIKAN NEGERI (JPN) SARAWAK

PADA

3 NOVEMBER 2020 (SELASA)

Bismillahirrahmannirrahim,

Assalamualaikum Warahmatullahi Wabarakatuh dan
Salam Sejahtera.

Terima kasih, saudara/saudari pengerusi majlis,

Yang Berusaha Tuan Haji Abang Mat Ali bin Abang
Masagus,

Pengarah Jabatan Pendidikan Negeri Sarawak,

Yang Dihormati Dr. Abang Hut bin Abang Engkeh,
Timbalan Pengarah Sektor Perancangan dan
Pengurusan PPD, Jabatan Pendidikan Negeri Sarawak,

Yang Diraikan Para Penerima Anugerah Perkhidmatan
Cemerlang Tahun 2019 dan Penerima Penghargaan
Perkhidmatan,

Tuan-tuan dan puan-puan sekalian.

1. Alhamdulillah, bersyukur kita ke hadrat Allah SWT dengan berkat izin dan limpah kurnia Inayah-Nya, kita diberikan kesempatan untuk sekali lagi bersama-sama berhimpun dalam Majlis Anugerah Perkhidmatan Cemerlang Jabatan Pendidikan Negeri (JPN) Sarawak Tahun 2019 pada hari ini. Sekalung ucapan terima kasih kepada warga JPN Sarawak khususnya YBrs. Tuan Haji Abang Mat Ali bin Abang Masagus, Pengarah Jabatan Pendidikan Negeri Sarawak dan Jawatankuasa Majlis Anugerah Perkhidmatan Cemerlang 2019 atas kesudian menjemput saya bagi menyempurnakan majlis ini.

2. Pertama sekali, saya ingin mengucapkan setinggi-tinggi penghargaan kepada warga JPN Sarawak yang sentiasa komited untuk melaksanakan tugas dengan penuh bersemangat demi kecemerlangan organisasi,

tidak kira apa sahaja tugas yang dipertanggungjawabkan atau diamanahkan.

3. Saya difahamkan bahawa seramai **34 orang** pegawai dari Ibu Pejabat JPN Sarawak akan menerima **Anugerah Perkhidmatan Cemerlang** bagi tahun 2019. Dalam masa yang sama, saya juga difahamkan bahawa terdapat seramai **tujuh (7) orang** pegawai akan menerima **penghargaan perkhidmatan** kerana telah berkhidmat lebih daripada 20 tahun ke atas secara berterusan di Ibu Pejabat JPN Sarawak.

4. Majlis Anugerah Perkhidmatan Cemerlang (APC) Tahun 2019 diadakan bagi menghargai sumbangan warga JPN Sarawak yang telah menunjukkan prestasi kerja cemerlang sepanjang tahun 2019. APC merupakan satu penghargaan kerajaan dan pengiktirafan kepada pegawai perkhidmatan awam yang telah berusaha secara berterusan melaksanakan kerja dengan cekap dan

produktif, beriltizam tinggi serta mensyukuri nikmat seperti yang terkandung dalam Teras Perkhidmatan Awam.

5. Selaku Setiausaha Persekutuan (SUP) Sarawak, saya amat berterima kasih dan menghargai komitmen tuan-tuan dan puan-puan yang telah melaksanakan tanggungjawab dengan penuh amanah, ikhlas dan bersungguh-sungguh ke arah mencapai kecemerlangan yang lebih gemilang.

6. Syabas dan setinggi-tinggi tahniah saya ucapkan kepada pegawai-pegawai jabatan yang telah berjaya menunjukkan prestasi kerja yang mencapai tahap yang terbaik sehingga terpilih sebagai penerima Anugerah Perkhidmatan Cemerlang pada kali ini. Pencapaian cemerlang ini merupakan pemangkin kepada usaha-usaha Kerajaan dan jabatan untuk mentransformasikan sistem pendidikan negara.

7. Saya pasti, kecemerlangan prestasi yang telah ditunjukkan pada tahun lepas mencerminkan saranan kepimpinan negara yang menjadikan “*Year of Delivery*” atau tahun pelaksanaan dan tahun penyampaian perkhidmatan Kerajaan telah disahut dengan jayanya. Suka saya berpesan di sini, teruslah melangkah dengan penuh cecal dan iltizam. Keutamaan dan fokus kita sebagai pihak yang menjayakan agenda Kerajaan ialah memastikan setiap dasar, program dan perkhidmatan dilaksanakan dengan cepat, tepat dan berkualiti supaya dapat memenuhi janji-janji Kerajaan kepada rakyat. Setiap dasar, projek, program dan perkhidmatan perlu mempunyai *value proposition* yang boleh membawa perubahan dalam kehidupan rakyat kepada yang lebih baik dan berupaya mencetuskan *feel good factor* terhadap perkhidmatan dan kualiti pendidikan.

Sidang hadirin yang dihormati sekalian,

8. Sesebuah organisasi kerap dinilai dari sudut kualiti penyampaian perkhidmatannya. Justeru, diharapkan dengan pengiktirafan yang diberikan pada hari ini, ia akan dapat memberi motivasi kepada semua penerima untuk terus mempertingkatkan produktiviti dan mutu kerja yang berkualiti tinggi. Pengiktirafan ini juga seharusnya mewujudkan persaingan yang sihat dalam kalangan semua pegawai dan kakitangan untuk membuktikan keupayaan masing-masing. Juga diingatkan dengan pengiktirafan yang diberi ini, tuan-tuan dan puan-puan perlulah juga membuktikan bahawa tuan-tuan dan puan-puan adalah selayaknya bergelar pegawai atau kakitangan yang cemerlang dan menjadi *role-model* kepada yang lain untuk terus berusaha dengan gigih agar matlamat yang disasarkan tercapai.

9. Seorang pegawai yang cemerlang seharusnya mempunyai tahap kecerdasan dan kecekapan yang tinggi, berkebolehan merancang, menganjur,

menetapkan keutamaan dalam menyelesaikan masalah. Integriti dapat dinilai sejauh manakah kita bersikap jujur terhadap diri sendiri dan rakan-rakan berlandaskan etika kerja. Keberanian dan kesediaan menerima cabaran, mengambil risiko dan kesanggupan menerima tugas yang besar juga merupakan ciri-ciri cemerlangnya seorang pegawai. Aspek yang paling utama ialah kekuatan dalaman seseorang individu pegawai. Setiap individu pegawai mestilah memiliki kesabaran, bersemangat kental dalam memastikan matlamat dan agenda pendidikan tetap dilestarikan terutamanya ketika berdepan saat-saat yang sukar seperti penularan pandemik COVID-19.

10. Di kala kita masih berperang untuk menangani wabak COVID-19 yang masih aktif ini di mana semalam (2 November 2020) dicatatkan sebanyak 14 kes positif baharu. Justeru, saya ingin mengingatkan semua kita untuk sentiasa patuh akan SOP yang telah ditetapkan

oleh pihak MKN. Tangguhkan urusan yang tidak penting dahulu dan elakkan 3S, kawasan yang sesak, elakkan kawasan yang sempit dan elak sembang atau bertutur dengan jarak yang dekat. Sentiasa amalkan 3W iaitu kerap mencuci tangan dengan air dan sabun, memakai pelitup separuh muka di tempat awam dan amalkan amaran daripada KKM iaitu jangan bersalaman @ bersentuhan, amalkan etika batuk dan bersin, lakukan disinfeksi dan dapatkan rawatan jika bergejala.

Sidang hadirin yang dihormati,

11. Pada hari ini, aspirasi negara untuk memiliki sistem pendidikan yang berdaya saing, kompetitif, cemerlang memerlukan lonjakan besar dari segi polisi, pelaksanaan serta penilaian pencapaian. Pewujudan sebuah sistem pendidikan yang bersifat 'glokal' iaitu mampu berdaya saing di peringkat global tetapi berakar umbi atau berpegang teguh pada jati diri atau lokal adalah amat penting. Oleh itu, warga Jabatan khususnya dan seluruh

Sarawak amnya akan berperanan dan bertanggungjawab dalam menghadapi era Revolusi Industri 4.0.

12. Saya menaruh kepercayaan yang tinggi bahawa warga JPN Sarawak di segenap lapisan akan terus bersama-sama berusaha memberikan perkhidmatan berimpak tinggi dengan cemerlang dan berintegriti serta melaksanakan penambahbaikan secara berterusan dalam menjayakan agenda transformasi perkhidmatan awam dan transformasi pendidikan negara yang seterusnya akan melahirkan modal insan berkualiti yang sebagai pewaris kesejahteraan dan kemajuan negara menjelang 2050.

13. Saya mendoakan semoga tuan-tuan dan puan-puan terus berisitiqamah dan beriltizam dalam menghadapi segala cabaran dan kemungkinan, kerana untuk melakukan perubahan, keazaman yang amat tinggi diperlukan demi menyempurnakan tanggungjawab yang

sama-sama kita pikul sebagai satu pasukan. Insyallah usaha kita akan diberkati dan aspirasi yang dihasratkan akan tercapai demi sebuah negara yang bernama Malaysia.

19. Akhir kata, saya sekali lagi merakamkan ucapan tahniah kepada semua penerima Anugerah Perkhidmatan Cemerlang tahun 2019 dan penerima penghargaan perkhidmatan di Ibu Pejabat JPN Sarawak yang diraikan pada hari ini. Moga dengan pengiktirafan ini akan lebih mempertingkatkan lagi motivasi tuan-tuan dan puan-puan untuk terus berkhidmat dengan lebih cemerlang lagi.

20. Setinggi-tinggi penghargaan diucapkan kepada semua warga JPN Sarawak yang terus-menerus menyumbangkan khidmat bakti tanpa mengira masa dan tenaga dalam mempertingkatkan prestasi JPN Sarawak. Sekalung tahniah dan terima kasih sekali lagi saya ucapkan kepada semua pihak yang telah menjayakan

pelaksanaan majlis pada hari ini.

21. Dengan lafaz Bismillahirrahmannirrahim, saya merasmikan Majlis Anugerah Perkhidmatan Cemerlang 2019 JPN Sarawak.

Kilau permata nian digilap,
Seri terpancar tepian selendang;
JPN Sarawak, warganya mantap,
Prestasi cemerlang, namanya gemilang.

Sekian.

Wabillahi taufik walhidayah, wassalamualaikum
warahmatullahi wabarakatuh.